

Besplatan  
magazin

www.superinfo.ba

# Superinfo

3.11.2017. / broj 184



**cm**  
COSMETIC MARKET

**SLAVIMO, JER  
14 GODINA IMAMO!**

*Slavite i vi s nama!*



SKUPŠTINA ZDK



POVELJA MIIRA  
KENANU HODŽIĆU



GITARE PO UZORU  
NA ČUVENI FENDER



AMIRA MEDUNJANIN  
ODUŠEVILA TRAVNICAŃANE

## PRIJEM ZA ČLANICE UDRUŽENJA ŽIVOT



Predsjedavajući Skupštine Zeničko-dobojskog kantona Jasmin Duvnjak, uz prisustvo kantonalnih zastupnica iz svih političkih partija, upriličio je prijem za članice Udruženja žena oboljelih od karcinoma dojke "Život". Ovu priliku članice Udruženja su iskoristile da upoznaju prisutne sa aktivnostima koje sprovode u okviru Udruženja. Ovo je bila i prilika da se javnost direktno upozna i sa inicijativom zastupnica Skupštine Kantona u vezi sa ranim otkrivanjem ove opake bolesti. Mjesec oktobar je posvećen aktivnostima borbi protiv karcinoma, a jedna od njih je i posjeta Skupštini Zeničko-dobojskog kantona kojom prilikom su aktivistice Udruženja podijelile roza mašnice svim prisutnim na 48. sjednici Skupštine. Predsjedavajući se zajedno sa zastupnicama zahvalio na posjeti i svim humanim aktivnostima koje Udruženje „Život“ sprovodi, kako bi se unaprijedila borba protiv ove opake bolesti.



## SKUPŠTINA ZDK

Skupština Zeničko-dobojskog kantona na posljednjoj sjednici je zauzela stav o Studiji „Modeliranje raspodjele javnih prihoda u Federaciji BiH sa refleksijama na ZDK“ te istu primila na znanje. Zaključak Skupštine skupa sa Zaključkom Vlade Kantona o primanju na znanje navedene Studije, sa samom Studijom kao njegovim sastavnim dijelom, te primjedbe, prijedlozi i sugestije poslanika Skupštine, iznesene tokom vođenja rasprave o ovoj Studiji, dostaviti će se Federalnom ministarstvu finansija, kao doprinos za izradu novog Zakona o pripadnosti javnih prihoda u Federaciji BiH, koji bi osiguravao pravedniju raspodjelu javnih prihoda između FBiH i kantona. Skupština je donijela Odluku o donošenju Programa razvoja zaštite i spašavanja od prirodnih i drugih

nesreća ZDK za period 2017.–2022. godina. Programom razvoja Zeničko-dobojskog kantona i drugim planskim dokumentima, osigurat će se neprekidan planski proces razvoja cjelovitog sistema zaštite i spašavanja na području Kantona. Program razvoja ZDK, Procjena ugroženosti Kantona od prirodnih i drugih nesreća i Planu zaštite i spašavanja ZDK od prirodnih i drugih nesreća, predstavljaju osnovne dokumente u kojima se utvrđuje cjelokupna organizacija i način funkcionisanja sistema zaštite i spašavanja ljudi i materijalnih dobara na prostoru koji pokriva ZDK. Poslanici u Skupštini su prihvatili Izvještaj o radu Kantonalne uprave za inspeksijske poslove za 2016. godinu.

## FERRETTO INVESTIRA U USORU

Miralem Galijašević, premijer Zeničko-dobojskog kantona, sastao se u svom kabinetu sa Džemalom Klepićem, direktorom Ferretto Group iz Italije, koja je novi investitor u Usori. Sastanku su prisustvovali kantonalni ministar za privredu Zlatko Jelić, načelnik Općine Usora Zvonimir Anđelić i vijećnik u OV-u Usora Alija Tokmić. Direktor Klepić je upoznao premijera sa prvom fazom investicije od 7,5 miliona eura koju ova grupa ulaže u izgradnju objekta i opreme u fabriku na području općine Usora. Riječ je o fabrici koja će proizvoditi logističke sisteme, paletne regale i opremu za skladišta, kao i softvere te o namjerama Ferreto Group za zapošljavanje oko 150 mladih ljudi. Klepić je objasnio da će kompletna planirana proizvodnja u objektu u Usori ići u izvoz. Premijer

Galijašević je izrazio zadovoljstvo što je ova kompanija svjetskog renomea došla u Zeničko-dobojski kanton i naglasio da će Vlada ZDK-a i dalje stvarati povoljan poslovni ambijent za razvoj poduzetništva i nova upošljavanja.



# SVEUČILIŠTE/UNIVERZITET "VITEZ"

## UČEŠĆE U PROGRAMU ERASMUS

U prisustvu velikog broja studenata Veleučilišta "Lavoslav Ružička" u Vukovaru, Republika Hrvatska, održana je svečana prezentacija i početak ERASMUS + programa u kojemu sudjeluju, pored Veleučilišta kao nositelja programa, i dva partnerska Sveučilišta iz BiH i Srbije. Sveučilište/Univerzitet „VITEZ“ i Fakultet za ekonomiju i inženjerski menadžment iz Novog Sada su partnerske visokoškolske ustanove koje će u sljedeće dvije godine ravnopravno participirati u implementaciji ERASMUS + programa pod nazivom Projekt 2017 – 1 – HR01 – KA 107 – 035067, koji govori o međunarodnoj mobilnosti nastavnika i studenata. Svečanu sjednicu i početak projekta otvorio je doc.dr. Mirko Smoljić, dekan Veleučilišta "Lavoslav Ružička" u Vukovaru, koji je istaknuo potrebu mobilnosti i razmjene iskustava između visokoškolskih ustanova kao garanciju daljnjeg napretka znanstvenih procesa u sve tri države. ERASMUS koordinatorica sa Veleučilišta Karolina Tetkić je predstavila Projekt 2017 – 1 – HR01 – KA 107 – 035067 i podvukla potrebu realizacije svih mjera koje su visokoškolske ustanove predstavile u ovom projektu. Prilikom prezentacije projekta, Sveučili-



šte/Univerzitet "VITEZ" Vitez je predstavio voditelj Ureda za međunarodnu suradnju, Siniša Dukić. Tokom prezentacije Sveučilišta i učešća naše visokoškolske ustanove Dukić je podvukao važnost kritičkog promišljanja kod mladih studenata i njihove permanentne potrebe za znanjem. Sveučilište/Univerzitet VITEZ je, na radnim sesijama, predstavljala i glavna tajnica Sveučilišta, Milena Sajević. Ovim projektom, koji traje dvije godine, predviđeno je da profesori i studenti Sveučilišta/Univerziteta VITEZ provedu određeni vremenski period na Veleučilištu "Lavoslav Ružička" u Vukovaru te iniciraju daljnje korake u suradnji između sve tri visokoškolske ustanove iz ove tri države. U ljetnom semestru akademske 2017/2018. godine očekuje se dolazak profesora i studenata sa Veleučilišta na Sveučilište Vitez kao i odlazak naših profesora i studenata na Veleučilište "Lavoslav Ružička" u Vukovaru.

## KONFERENCIJA

Sveučilište/Univerzitet „VITEZ“ organizira V. ekonomsku konferenciju „Reformska agenda u funkciji poticanja razvoja gospodarstva i novog zapošljavanja“ koja će se održati 24.11.2017.g. u FC BiH u Vitezu. Cilj konferencije je analizirati efekte dosadašnjeg provođenja reformske agende kao i definiranje potrebnih dodatnih mjera koje će pospješiti njeno daljnje provođenje.

## MEĐUNARODNI DOKTORSKI STUDIJ



Na poslijediplomskom studiju Fakulteta poslovne ekonomije organizira se i izvodi studijski program International Business Administration (PhD), koji se u cijelosti odvija na engleskom jeziku, po principima DL studiranja (učenja na daljinu). Program je osmišljen radi zadovoljenja potreba onih koji su već stekli profesionalno iskustvo, a žele studirati međunarodno poslovanje na doktorskoj razini te raditi u područjima multikulturalne razmjene, koja zahtijeva samoinicijativne i vješte menadžere sa interkulturalnim kompetencijama i sposobnostima integriranja različitih aspekata poslovanja i upravljanja u međunarodnom okruženju. Posebnost ovog studijskog programa ogleda se u angažiranju brojnih stručnjaka iz prakse i uglednih profesora s vodećih sveučilišta/univerziteta iz Velike Britanije, Italije, Njemačke, Portugala, Poljske kao i drugih država širom svijeta. Pri izradi doktorske disertacije cijeli profesorski tim Vam je na raspolaganju, a završetkom studija stječete 180, tj. ukupno 480 ECTS bodova.

## KRATKI FILM #TAGGED

U amfiteatru Sveučilišta „VITEZ“ u Travniku održana je premijera kratkog filma #tagged u kojem se obrađuje tema zaštite djece i mladih od opasnih igara i igrice na internetu. Režiju potpisuju prodekan FIT-a, doc.dr. Hadžib Salkić i Jakov Sušac, koji je i autor scenarija. „Veliki broj djece masovno se uključuje na društvene mreže, istodobno nespretna suočiti se sa opasnostima koje vrebaju na internetu. Njegovo nekontrolirano korištenje opasnost je i za odrasle, a pogotovo za djecu. Ponavljam da je stalna kontrola i briga o djetetu najbolja prevencija, a time i zaštita od opasnosti koje vrebaju u virtualnom svijetu“, kazao je doc. dr. Hadžib Salkić, koji je iste večeri predstavio i priručnik pod naslovom „Zaštita mladih od opasnih igara i igrice na internetu“. Cilj priručnika je omogućiti učenicima i njihovim roditeljima, nastavnicima, kao i društvu u cijelosti, prikaz opasnosti na internetu, upoznavanje s



aplikacijama, koje djeca i mladi koriste dovodeći se u opasnost, te načine zaštite. Uz savjete kako otkriti i pravovremeno reagirati na spomenute opasnosti, u priručniku se mogu pronaći i zakonski propisi koji tretiraju tu oblast. Uz doc.dr. Hadžiba Salkića o ovoj temi je govorila i mr. Jasna Eminović, jedna od autorica priručnika, koja je naglasila kako se i kroz nastavne procese, u suradnji sa svim zaposlenima u obrazovnim ustanovama, mogu provoditi programi prevencije nasilja na internetu i zaštite od opasnih igara. „Samo zajednički, kao tim, možemo raditi na tome da imamo zdravu društvenu zajednicu“, naglasila je mr. Jasna Eminović. Predstavljeni priručnik za sada je tiskan u 30 primjeraka, a uskoro će biti dostupan i u elektroničkoj verziji.



## SASTANAK SA PREDSJEDAVAJUĆIMA VIJEĆA

Jasmin Duvnjak, predsjedavajući Skupštine Zeničko-dobojskog kantona, dopredsjedavajući Skupštine Ivo Tadić i Draženka Subašić održali zajednički sastanak sa predsjedavajućim općinskih i gradskih vijeća u ZDK. Na ovaj sastanak su pozvani i sekretari općinskih vijeća i Gradskog vijeća Zenica. Sastanak je realiziran u saradnji sa Misijom OSCE-a u BiH. Cilj ovog sastanka je unaprijeđenje komunikacije i jačanje saradnje između vijeća svih jedinica lokalne samouprave u ZDK, a riječ je o prvom sastanku ovog tipa od nastanka Kantona i od strane svih učesnika ocijenjen je veoma korisnim, sa obavezom da se održavaju

minimalno jednom godišnje. Ovom prilikom su prisutni upoznati sa Planom komunikacija Skupštine Kantona, a potom su razmatrana najvažnija pitanja vezana za dvosmjernu komunikaciju i saradnju između Skupštine Kantona i svih općinskih vijeća/gradskog vijeća, te o načinima unaprijeđenja dvosmjerne komunikacije i saradnje na nivoima ovih zakonodavnih organa vlasti. Predsjedavajući Duvnjak je na kraju pozvao sva općinska i gradska vijeća da svojim prijedlozima i inicijativama aktivno uzmu učešće u kreiranju Programa rada Skupštine ZDK za 2018. godinu.

## ZAHVALNIČA KASUMOVIĆU



Povodom prijateljskog odnosa Gradske uprave Zenica na čelu s gradonačelnikom Fuadom Kasumovićem prema Udruženju paraplegičara i oboljelih od dječije paralize Zenica, gradonačelniku je uručena zahvalnica. Zahvalnicu je uručila Samira Džidić, članica ovog Udruženja. Predsjednik Udruženja Harun Aliefendić zahvalio se gradonačelniku na prijemu i dosadašnjoj podršci i istakao da je ova zahvalnica priznanje Gradskoj upravi i gradonačelniku za aktivnosti koje su poduzete u cilju poboljšanja uslova života osobama sa invaliditetom u gradu Zenica. Izrazio je nadu da će ono što je realno moguće uraditi za ovu kategoriju građana biti realizovano od strane Gradske uprave.

## UGOVOR O MILIONSKOJ DONACIJI KFW-A ZENICI



Gradonačelnik Zenice Fuad Kasumović stavio je potpis na Ugovor o prihvatanju grant sredstava njemačkog KfW-a za projekat "Prikupljanje i tretman otpadnih voda u Zenici". Vlada SR Njemačke će posredstvom KfW-a sa 13.516.696,80 eura finansirati rješavanje problematike

bude što kvalitetnije i vremenski što brže realizovan, što je u interesu naših građana", prilikom potpisivanja u sarajevskom sjedištu "Kreditanstalt fur Wiederaufbau" izjavio je gradonačelnik Kasumović. Predstavnici donatora istakli su, kako su se uvjerali da su Grad Zenica

sakupljanja i tretmana otpadnih voda grada Zenica. "Sretni smo što smo dobili sredstva od njemačke Vlade i Grad Zenica će učiniti sve da projekat

i Jedinica za implementaciju projekta, odnosno JP "Vodovod i kanalizacija" Zenica organizovane i snažne institucije kojima su s pravom povjerali jednu od najvećih donacija. U ambasadi Švicarske u Sarajevu održan je prvi sastanak Upravnog odbora Programa vodosnabdjevanja i odvodnje u BiH II. Osim gradonačelnika Zenice, sastanku je prisustvovala i lokalna vlast iz Tuzle. Podsjećamo, ukupni troškovi projekta iznose 19.266.687 eura i finansiranje je osigurano bespovratnim sredstvima KfW-a u iznosu 13.516.696,89 eura, švicarskog Secoa u iznosu od 4.750.000 eura i doprinosima Grada Zenica za nastavak izgradnje biciklističkih staza u iznosu 1.000.000 eura i JP "ViK" od 800.000 eura.



## TRAVNIK POSTAJE NEZAIBILAZNA TURISTIČKA DESTINACIJA U BIH

Općina Travnik postaje nezaobilazna turistička destinacija u BiH, a turizam jedna od najznačajnijih grana za razvoj, rečeno je u okviru obilježavanja Svjetskog dana turizma, u organizaciji Turističke zajednice Srednjobosanskog kantona, Općine Travnik i Zavičajnog muzeja.

- Općina Travnik u posljednje tri do četiri godine postaje nezaobilazna turistička destinacija i prema svim informacijama, kad sumiramo rezultate, atraktivna je gostima tijekom svih 365 dana u godini, kazao je direktor Turističke zajednice SBK-a Miroslav Matošević, ističući da, osim Vlašića, kao poželjnog odredišta

za domaće i inostrane goste, veliki potencijal ima bogata kulturno-historijska baština općine. Matošević se osvrnuo i na izradu strateškog dokumenta iz oblasti turizma koji će, kako očekuje, ponuditi sustavna rješenja kako bi Travnik bio svrstan među pet najznačajnijih turističkih destinacija u BiH. Načelnik Općine Travnik Admir Hadžiemrić ukazao je na potrebu rješavanja zakonske regulative, odnosno usvajanja federalnih zakona o turističkim zajednicama, taksama i ugostiteljstvu.

- Zakonska regulativa trenutno nas malo koči, a ovi zakoni su veoma značajni jer

će nam omogućiti dodatnu kvalitetu, kako u organizacijskom, tako i ekonomskom smislu, kazao je Hadžiemrić.

On je istaknuo da postoji još dosta prostora za unaprjeđenje te se osvrnuo i na problem ograničenog smještajnog kapaciteta, odnosno nedostatak hotela u gradu, pozivajući zainteresirane investitore na ulaganje u tu oblast. Govoreći o ulozi kulturno-historijske baštine u razvoju turizma, direktorica Zavičajnog muzeja Travnik Fatima Maslić ocijenila je da se Travnik u tom smislu već potvrdio kao važna turistička destinacija, naglašavajući da je u tom procesu Zavičajni muzej veoma bitna karika. Travnik u urbanom smislu predstavlja spoj istoka i zapada, jer se, ovisno gdje se nalazite, može doživjeti utjecaj različitih civilizacija i kultura, rekla je ona, naglasivši kako Zavičajni muzej, uz brigu o kulturno-povijesnom naslijeđu, radi i na otkrivanju novih destinacija koje se mogu uklopiti u turističku sliku Travnika. Maslić je istaknula da je u tijeku izrada turističke mape koja bi locirala sva kulturna dobra u Općini Travnik i koja bi poslužila za organiziranje tematskih turističkih posjeta. U povodu obilježavanja Svjetskog dana turizma, predstavljen je i novi promotivni video Travnika i okolice.

## SREDSTVA ZA IZRADU STUDIJE ZA IZGRADNJU CENTRA ZA UPRAVLJANJE OTPADOM

Njemačko Ministarstvo okoliša osiguralo je sredstva za izradu studije za izgradnju Centra za upravljanje otpadom koji bio riješio višegodišnji problem četiri općine Lašvanske doline, potvrdio nam je Mihael Vajhert (Weichert), počasni konzul BiH u Njemačkoj i predsjednik Društva za unaprjeđenje gradskog partnerstva Lajpcig – Travnik. Društvo za unaprjeđenje gradskog partnerstva Lajpcig – Travnik je u saradnji sa općinama Lašvanske doline iniciralo projekat izgradnje Centra za upravljanje otpadom jer općine Travnik, Vitez, Novi Travnik i Busovača već godinama imaju problem s zbrinjavanjem otpada. Kada je projekat došao u fazu gdje je potrebna stručna analiza i pomoć eksperata sve je delegirano njemačkom Ministarstvu okoliša koje



je odobrilo sredstva za izradu studije. Sa ovim su počasni konzul Vajhert (Weichert) i konsultant Holger Čense (Tschense) upoznali načelnike četiri općine. Nije jednostavno doći do sredstva, ali smo dobili informaciju da su sredstva odobrena i da se u naredna 23 mjeseca napravi koncept i Studija budućeg Centra za upravljanje otpadom za četiri općine. – istaknuo je počasni konzul Vajhert (Weichert). Cilj projekta je izgradnja centra za upravljanje otpadom po evropskim standardima koji bio bio

samoodrživ. U narednom periodu napravi ćemo analizu kakvo je trenutno stanje, šta ima od otpada i šta se može prerađivati. Studija će sadržavati i dio koji se odnosi na to sa kojim javnim partnerima idemo u projekat, ne samo iz BiH, nego i iz Evrope i Njemačke. Najviše će se raditi na reciklaži. Centar bi bio samoodrživ, pojasnio je Holger Čense (Tschense), konsultant i bivši zamjenik gradonačelnika Lajpciga. Komunalni otpad iz Travnika, Novog Travnika, Viteza i Busovače odvozi se na Regionalnu deponiju Mošćanica u Zenicu. Ovaj proces stvara velike troškove i općinama i komunalni preduzećima, a izgradnja Centra za upravljanje otpadom za ove četiri općine sveo bi se na minimum otpad jer budući centar bi imao sortirnicu i dio za kompost.

## ZA NOVE FILTERE 10 MILIONA KM



ArcelorMittal Zenica potpisao je ugovor vrijedan 9,6 miliona maraka sa italijanskom kompanijom Ekoplant, i time započela realizaciju projekta ugradnje sistema za sekundarno otprašivanje u pogonu BOF Čeličana. Ukupna vrijednost izvođenja projekta premašit će 10 miliona KM. - Danas pravimo važan korak ka postizanju našeg cilja dugoročne i održive budućnosti proizvodnje čelika u ovom povijesnom industrijskom gradu. Smanjenje štetnog utjecaja na okoliš je važan dio našeg puta. Još jednom pokazujemo da smo posvećeni stalnom investiranju u najnovije i najbolje tehnologije kako bismo napravili istinsku promjenu u našem gradu, kazao je Biju Nair, generalni direktor AMZ. Iz kompanije su naveli da očekuju da rad na novim filterima završe do početka 2019. godine. Filteri bi trebali ispuniti sve važne standarde koje su postavile BiH i EU, i eliminirat će vidljivi „crveni dim” koji izlazi iz pogona. Više od 95% dimnih plinova iz proizvodnih procesa biće zadržano i očišćeno u vrećastom filteru, što će rezultirati smanjenjem emisije prašine na manje od 10mg/Nm3.



## POVELJA MIRA KENANU HODŽIĆU

I ove godine u zeničkoj crkvi svetoga Ilije Proroka, 25. oktobra Odbor za međureligijsku saradnju grada Zenice organizovao je međureligijsku manifestaciju Duh Asiza. Manifestacija, koja je ove godine organizovana uz podršku Grada, okupila je veliki broj uzvanika iz ambasada, međunarodnih i domaćih organizacija, mirovnih misija i vjerskih zajednica. Pored gradonačelnika Zenice, predsjedavajućih gradske i kantonalne Skupštine, zastupnika, vijećnika, prisutni su bili gosti iz petnaest gradova širom naše zemlje. Bogat program činili su

članovi muzičkih sastava Novo nebo i Katera, hora bogoslovije Svetog Petra Dabrobosanskoga, hora En Nahl, hora Željezara, VIS Jukić te hora Osnovne muzičke škole, a učestvovali su i glumci BNP-a Faketa Salihbegović-Avdagić i Mugdim Avdagić.

Na početku prisutnima su se u ime Odbora obratili predsjedavajući vlč. Vlatko Rosić, a u ime župne zajednice fra Zdravko Anđić. - Svjedočeći i živeći „asišku logiku” i mi se svake godine okupljamo da pjevajući i moleći zajedno zavapimo jednome Bogu za mir, slogu, ljubav i zajedništvo svih naroda na zemlji, poručili su. Dodijeljeno je tradicionalno priznanje koje su ustanovile vjerske zajednice i crkve Zenice kao najveće priznanje zeničkog Odbora - Zenička povelja mira, koju je ove godine dobio sekretar Kenan Hodžić, za sedmogodišnji angažman i promociju Zenice kao grada međureligijskog dijaloga. U svome obraćanju Hodžić je, između ostaloga, kazao: - Odbor za međureligijsku saradnju u našem gradu rodio se kao izvorna želja nas Zeničana da idemo putem budućnosti, i to svjetlije i radosnije. Sedmu godinu koračamo tom cestom, na njoj ima mnogo krivina i slabo je popločana ta cesta, ima na njoj i ljubavi, sreće, osmijeha, ali i bola, patnje, ljutnje... Ove godine Duh Asiza u Zenicu je stigao sa viješću - zavoli! Ne živi egoistički, nego zavoli, čovjeka u sebi i ljude oko sebe!



## REKONSTRUKCIJA PRUSAČKE ULICE

U toku je rekonstrukcija Prusačke ulice u MZ Pišće, Zenica. Ova ulica je uslijed višegodišnjeg prokopavanja od strane raznih subjekata (vodovod, el. distribucija, kablovski operateri), te usljed vremenskih uslova, prilično propala, te je rekonstrukcija koja se vrši ovih dana

prva u proteklih 40 godina, saopšteno je iz press centra nezavisnog vijećnika u Gradskom vijeću iz reda nacionalnih manjina, Asima Ake Musića. Sredstva za rekonstrukciju ulice, na inicijativu vijećnika Asima Ake Musića, obezbjeđena su iz Gradskog budžeta.



## KOD 46 POSTO VOZILA UTVRĐENA NEISPRAVNOST



Na području Srednjobosanskog od 10. do 12. oktobra provedena je preventivna provjera ispravnosti vozila kojom je kod 54 posto pregledanih vozila utvrđeno da su ispravna, dok su u 46 posto slučajeva na vozilima konstatovano da su tehnički neispravna, potvrđeno nam je iz Instituta za privredni inženjering.

Kontrolisano je 128 vozila koja su nakon zaustavljanja od strane policijskih patrula upućena na vanredni tehnički pregled. Radi se o 11 putničkih motornih vozila, 43 autobusa, 70 privrednih vozila i jednom priključnom vozilu.

U 46 posto slučajeva utvrđena je neispravnost, a prema riječima doc.dr. Fuada Klisure, direktora IPI – Instituta za privredni inženjering i profesora na Mašinskom fakultetu u Zenici, problemi su starost vozila i slabo održavanje.

-Zbog svega navedenog kod neispravnih vozila konstatovano su kvarovi na svjetlosnom, kočionom i upravljačkom sistemu. Po mom mišljenju ovo je uspješna akcija, jer je imala publicitet u medijima. Vozači su znali za akciju, a ostavrena je po prvi puta i saradnja sa policijom i stanicama tehničkog pregleda. Policijske patrole imale su ovlaštenje da pošalju vozila na vanredni tehnički pregled u najbližu stanicu, kazao je Klisura.

U narednom periodu službenici policije u Srednjobosanskom kantonu nastavit će sa sličnim akcijama sa posebnim akcentom na vozila kojima se prevoze učenici, a radit će se i preventivno na podizanju svijesti kod vozača kako bi posvetili pažnju održavanju vozila i tehničkoj ispravnosti.



## MILIONSKE INVESTICIJE U ZDRAVSTVENE USTANOVE

U javno-zdravstvenom sektoru Srednjobosanskog kantona u toku je izvođenje radova na Bolnici za plućne bolesti i TBC te Bolnici „Dr. fra Mato Nikolić“ u Novoj Biloj. Riječ je o rekonstrukciji fasadnih površina predračunske vrijednosti 170.000 KM.

– U Novoj Biloj u ovoj godini završit će se i rekonstrukcija terase i stropne ploče suterena. Osim ovih projekata u Novoj Biloj, ukoliko se okonča procedura javnih nabavki, zamijenit će se i stolarija na južnoj fasadi bolnice, predračunske vrijednosti 75.000 KM. Ukupna vrijednost radova koji se finansiraju ili sufinansiraju u ove dvije bolnice iznositi će više od 300.000 KM. Jedan dio sredstava, oko 100.000 KM, daje Federalno ministarstvo prostornog uređenja, a ostatak je osigurala Vlada SBK, kaže ministar zdravstva i socijalne politike Nikola Grubešić.

U Bolnici u Novoj Biloj, nakon završetka ovih radova, okončat će se projekt utopljanja koji se realizira već nekoliko godina, a podrazumijevao je i promjenu energenta, kotlovskih postrojenja, zamjenu stolarije na bolnici, sanaciju i ravnih i kosih krovnih površina na svih pet lamela, kao i dio instalacija.

- Bez investicijske vrijednosti šeste lamele, koja će iznositi oko 2 miliona KM, u projekt energetske učinkovitosti uloženo je 450.000 KM. Sredstva za ovaj projekt osigurali su Vlada SBK, Federalno ministarstvo prostornog uređenja, Fond za okoliš FBiH i Razvojni program UN-a, koji je namijenjen za BiH, ističe ministar Grubešić.

U Bolnici za plućne bolesti i TBC u Travniku, osim radova u i na bolnici koji su se realizirali u posljednjih pet-šest godina, jedan manji dio površine bolnice ostat će da se adaptira i stavi u funkciju u narednom periodu.

- Osim građevinskih radova, razvojni program je finansirao i dio bolničkog kapaciteta u kojem je smješten laboratorij. U planu SBK, odnosno Ministarstva i bolnice, jeste otvaranje novog Odjela onkologije, na kojem bi se aplicirale jednostavne terapije kod onkoloških pacijenata. Bitno je naglasiti da je dio novčanih sredstava osigurala i bolnica iz tekućeg poslovanja, kaže Grubešić.

### Ulaganja u dijagnostiku

Ulaganja u dijagnostiku UN je u BiH inicirao projekt koji se odnosi na liječenje i suzbijanje tuberkuloze, a Vlada SBK je na jednoj od svojih sjednica donijela odluku da će u sljedeće tri godine finansirati nabavku lijekova za tzv. ATL terapiju i na ovaj način nastaviti vrlo uspješan projekt suzbijanja ove opasne zarazne bolesti. Od prošlog mjeseca u toku je javni konkurs za nabavku digitalnog RTG uređaja za Bolnicu za plućne bolesti i TBC, kao i nabavku CT uređaja za bolnicu u Novoj Biloj. Procijenjena vrijednost ove nabavke je oko 800.000 KM. Ranije je Vlada SBK u cijelosti osigurala sredstva za ove uređaje, kao i nabavku CT-a u JU Bolnica.



## MJERNA OPREMA ZA MONITORING KVALITETE ZRAKA

Gradonačelnik Zenice Fuad Kasumović potpisao je sa rektorom Univerziteta u Zenici, prof.dr. Damirom Kukićem i direktorom Metalurškog instituta "Kemal Kapetanović", doc. dr. Raifom Seferovićem, ugovor o ustupanju na korištenje mjerne opreme i uređaja za monitoring kvalitete zraka Metalurškom institutu "Kemal Kapetanović" Univerziteta u Zenici. Prema ovom Ugovoru, Grad Zenica ustupa na korištenje mjernu opremu i uređaje za monitoring kvaliteta zraka koje je nabavio vlastitim sredstvima i donacijama dobijenim od Fonda za

zaštitu okoliša FBiH, a radi se o mjernim stanicama Tetovo, Radakovo i Centar, te dva kolor displeja dimenzija 6x4m i dva kolor displeja dimenzija 2x1m. Metalurški institut "Kemal Kapetanović" i Univerzitet u Zenici će dostavljati Gradskoj upravi i resornim službama izvještaje o koncentracijama zagađujućih materija u zraku na području grada Zenica, a podaci će biti postavljeni na web stranici mreže za monitoring kvaliteta zraka Zeničko-dobojskog kantona kada ona bude u funkciji. Ugovor je zaključen na dvije godine, uz mogućnost njegovog produženja

## IZLOŽBA SITNIH ŽIVOTINJA U ZENICI



U organizaciji zeničkog Udruženja za uzgoj i zaštitu sitnih životinja, u sajamskoj hali na Kamberovića polju od 27. do 29. oktobra održane su 14. međunarodna i 32. međugradska izložba ptica, golubova, ukrasnih peradi, kunića i akvarijskih ribica. Sa oko 2.000 različitih eksponata učestvovali su uzgajivači sitnih životinja iz Srbije, Hrvatske i BiH. Ove godine obilježavaju

se dvije decenije izlaska Zeničkog prevrtača na izložbe, ali i 61. godina djelovanja zeničkog Udruženja. Golub Zenički prevrtač ponos je svih golubara ovoga kraja, a osim njega, na izložbi su predstavljeni zasebno i ostale bh. autohtone vrste golubova: Sarajevski prevrtač, Travnički kratkokljuni golub, Bihački prevrtač, Janjarski, Bijeljinski, Dubički i Hercegovački prevrtač.

## DIDAKTIČKA OPREMA



Štićenici JU Centar za djecu i odrasle sa posebnim potrebama iz Zenice dobili su nove igračke i didaktičku opremu potrebnu za rad koju su im povodom obilježavanja svog jubileja, 20 godina postojanja, uručili predstavnici kompanije Mikrofin. Opremu je uručila Sanja Babić-Halilović, šefica filijale Mikrofina u Zenici, ne skrivajući zadovoljstvo zbog ove donacije i njenog humanog cilja. Kanita Sarajlić, v.d. direktora Centra, zahvalila je na donaciji i naglasila da će oprema koristiti radnicima, kao i djeci da obogate svoje svakodnevne radne i zabavne aktivnosti. JU Centar za djecu i odrasle sa posebnim potrebama ima oko 300 štićenika.

## EKOLOŠKI SLOGANI



Regionalna razvojna agencija za regiju centralna BiH - REZ Agencija, zajedno sa 11 osnovnih škola iz Zenice, realizovala je aktivnost lijepljenja afirmativnih ekoloških naljepnica na unutarnja stepeništa škola. Osim očuvanja životne sredine, cilj ove aktivnosti je i informisanje najmlađih o prednostima pravilnog odlaganja otpada. Škole su dobile i postere "Našeg smetka", animiranog lika u obliku kante za otpad, koji osmijehom poziva najmlađe da odlažu otpad na mjesta predviđena za to.

**kristal**<sup>®</sup>  
Vaš svijet stakla



# STAKLENA VRATA I PREGRADE

Staklene vrata i pregrade se mogu koristiti unutar prostora ukoliko želite otkloniti vizualne barijere koje umanjuju količinu svjetlosti u Vašoj prostoriji. One pružaju prozračnost i nesputanost, te na elegantan način obogaćuju Vaš interijer. Staklena vrata i pregrade se sve više koriste u modernoj stambenoj izgradnji i u poslovnim prostorima. Mogu biti napravljene od sigurnosnog stakla (kaljenog i laminiranog), transparentne ili u bojama.

info@kristal.eu  
www.kristal.eu  
T +387 30 717 733  
F +387 30 713 111  
Poslovni centar 96  
72250 Vitez BiH





## POTICAJI PRIVREDA USORA

Nakon što je Općinsko vijeće Usora po prvi puta u općinskom budžetu za 2017. godinu utvrdilo poticaj za razvoj privrede, te nakon toga usvojilo i Program poticaja za razvoj privrede u 2017. godini, općinski načelnik je raspisao Javni poziv za odobravanje ovih poticaja. Završetkom roka utvrđenog u javnom pozivu, i nakon obrade pristiglih prijava od strane komisije utvrđeno je da su uslove iz javnoga poziva ispunila 3 novoosnovana obrta, a za dva je utvrđeno da ne ispunjavaju uslove. Ugovore sa novim obrtnicima u ime općinskog načelnika Zvonimira Anđelić

potpisao je pomoćnik Anto Bonić, a činu potpisivanja prisustvovala je i službenica Marta Pranjčić iz Odsjeka za proizvodne i uslužne djelatnosti, poljoprivredu, šumarstvo i vodoprivredu.

Tri obrta koji su dobili poticaje i koji su potpisali ugovore su: Farma „BEJIC“, u iznosu 2.500 KM, Pokretni gril, „Sivša“, u iznosu 2.000 KM i Obrtnička radnja „NOVA PLAST“ Žabljak, u iznosu od 3.500 KM. Navedeni obrtnici su preuzeli obvezu zapošljavanja ukupno sedam radnika i Općina Usora će u naredne dvije godine pratiti ispunjenje preuzetih obveza.

## EKONOMSKO OSNAŽIVANJE ŽENA

Stručna nevladina organizacija „Medica“ Zenica održat će u Centru za kulturu Zavidovići 22.11.2017. godine (srijeda) u 11 sati prezentaciju Priručnika o ekonomskom osnaživanju žena. Prezentacija je predviđena kao jedna od aktivnosti koje će se održati u sklopu 10 dana aktivizma protiv rodno zasnovanog nasilja u Bosni i Hercegovini. Ista će takođe biti održana i u Žepču i Maglaju. U Zavidovićima partneri u tom projektu su tri udruženja žena: „Krivaja-Iskra“, „Kovači“ i „Majska ruža“, kao i Općina



Zavidovići. Pored članica udruženja žena i predstavnika Medike prezentaciji će prisustvovati i općinski zvaničnici, predstavnici institucija, ustanova, udruženja i medija sa područja općine. Vrijedne ruke članica ova tri udruženja žena preuzele su na sebe pripremu zakuske i gostoprinstvo na ovom događaju.

## PODSTICAJ ZA LJEKOVITO BILJE, SVJEŽE VOĆE I POVRĆE



Općina Kakanj je uputila obavijest svim pravnim licima koja se bave organiziranim otkupom ljekovitog bilja, voća i povrća, a koja su obavila otkup od individualnih poljoprivrednih proizvođača sa područja općine Kakanj, da mogu podnijeti zahtjev za ostvarivanje općinskog novčanog podsticaja za otkupljene količine ljekovitog bilja, svježeg voća i povrća. Iznos podsticaja je do 0,02 KM/kg otkupljenog ljekovitog bilja, svježeg voća i povrća. Rok za podnošenje zahtjeva je 24.11.2017. godine. Zainteresirani mogu preuzeti obrazac zahtjeva na protokolu Općine Kakanj, te uz neophodnu dokumentaciju isti predati na mjestu preuzimanja.

## LITERARNI RADOVI

Povodom obilježavanja Dana općine Žepče, KŠC Don Bosco Žepče je organizirao Natječaj za najbolji literarni rad učenika. Teme radova trebale su biti vezane uz Žepče, ljubav prema rodnom kraju i domovini. U kategoriji četverogodišnjih škola prvo mjesto osvojila je Branka Matijević, učenica III. b razreda Opće gimnazije, a u kategoriji trogodišnjih škola najbolji rad napisao je Ivan Marinović iz II. b razreda Tehničko-obrtničke škole.

## PERIŠ U POSJETI ŽEPČU

U okviru Konzularnih dana Veleposlanstva Republike Hrvatske u BiH, Žepče je posjetila Ministar savjetnik za gospodarstvo Bernardica Periš.

Tom prilikom općinski načelnik Mato Zovko u uredu je primio Ministricu i upoznao je o stanju privrede u općini Žepče. Razgovaralo se i o novčanoj pomoći koju svake godine Vlada Republike Hrvatske preko Javnih natječaja donira za razne projekte koji su od velikog značaja za Hrvate u BiH.




Služba za školsku higijenu INZ Zenica provodi skrining program za rano otkrivanje

# DEFORMITETI LOKOMOTORNOG SISTEMA KOD ŠKOLSKE DJECE SVE IZRAZENIJI

**N**eudobne stolice, školske torbe neadekvatnog oblika i težine, rad za računarom, nepravilna ishrana i nedovoljna fizička aktivnost uzrokuju značajan porast prisutnosti deformiteta lokomotornog sistema, navodi se u upozorenju Instituta za zdravlje i sigurnost hrane Zenica.

S ciljem preventivnog djelovanja Služba za školsku higijenu Instituta za zdravlje i sigurnost hrane Zenica kontinuirano provodi skrining program za rano otkrivanje poremećaja lokomotornog sistema za učenike osnovnih škola na području Zeničko - dobojskog kantona s ciljem preveniranja eventualnih negativnih uticaja na rast i razvoj djece.

Skrining se sastoji iz dva djela, vizuelni pregled, te pregled kičmenog stuba i stopala pomoću aparata – skoliometra i podoskopa. Nakon obavljenog skrining pregleda kod djece kod koje se uoči odstupanje od uobičajenih vrijednosti izdaje se uputnica/preporuka za dalju dijagnostičku obradu kod ljekara opće/porodične medicine, te kod fizijatra.



**\* Tipovi deformiteta kičme: 1. Normalan položaj, 2. Kifoza, 3. Skolioza, 4. Lordoza**

Djeca dnevno prosječno provedu oko šest sati sjedeći u školskim klupama, a osim toga na putu od kuće do škole i obratno nose pretrpane školske torbe. Lokomotorni sistem je koštano-zglobno-mišićni sistem koji omogućava promjenu položaja u prostoru, daje čvrstinu tijelu i dinamiku pokretima. U svakodnevnom životu primjetno je da veliki broj djece, ali i odraslih, zauzima nepravilan stojeći ili sjedeći položaj.

Najčešći deformiteti lokomotornog sistema su kifoza (pogrbljenost), skolioza (krivljenje kičme u stranu), te lordoza (pre naglašena krivina u slabinskom dijelu). Pogrbljenost javlja kao povećana krivina kičmenog stuba u grudnom dijelu, ali i drugim dijelovima kičme, dok krivljenje kičme u stranu se karakteriše pojavom asimetrije na tijelu (ramena nisu u istom nivou, jedna lopatica izraženija od druge, neravnomjerni struk, jedan kuk viši od drugog). Lordozu pak karakteriše veliki jaz između slabinskog dijela leđa i poda kada osoba leži na leđima na čvrstoj površini, te bol u leđima, nelagodnost i problemi u kretanju.



Nepravilnosti u razvoju grudnog koša manifestuju se kao „kokošije grudi“ (izbočena grudna kost) i ljevkast grudni koš (udubljena grudna kost) i obično su udruženi sa deformitetima kičmenog stuba. Spušteno ili ravno stopalo je stanje u kojem stopalo dodiruje pod punom površinom umjesto samo vanjskim djelom što je slučaj kod normalnog stopala. Može biti spuštено jedno stopalo, a češće su spuštena oba. Za korekciju ovog poremećaja koriste se ortopedski ulošci koji podižu stopalo i kosti noge na normalnu visinu, težina se ravnomjerno raspoređuje, te ublažavaju efekte spuštenih stopala kao što su bolovi.

Da bi navedeni deformiteti kičmenog stuba, grudnog koša i stopala bili uspješno liječeni najvažnije je njihovo rano otkrivanje redovnim skrining programima, te kontrolama.

Znaci koji mogu da ukazuju na prisustvo deformiteta mogu se potvrditi pažljivim posmatranjem djeteta u uspravnom položaju. Najprije se posmatraju stopala, da li je težina ravnomjerno raspoređena, položaj prstiju i skočnih zglobova. Noge, karlica, lopatice i rameni pojas trebaju da budu simetrični. Kičmeni stub posmatran s leđa treba da bude u pravoj liniji.

Fizijatar će djecu kod kojih se uoče nepravilnosti



**\* Tipovi deformiteta stopala:**

1. Normalan položaj,
2. Podignut svod,
3. Spušten svod

uputiti na korektivnu gimnastiku (terapijske vježbe koje imaju za cilj ponovno uspostavljanje narušene ravnoteže između koštano-zglobnog sistema i mišića). Korigovanje deformiteta kičmenog stuba je dugotrajan proces koji zahtijeva veliko angažovanje kako zdravstvenih radnika, tako i djeteta i njegovih roditelja.

Iz Instituta za zdravlje i sigurnost hrane na kraju napominju i da visina stolice i stola moraju omogućiti da dijete drži obje noge na podu, da sjedi pravilno s blago nagnutim trupom. Ramena bi trebala da budu opuštena, glava uspravna, a nadlaktice smještene uz tijelo. Rastojanje očiju od klupe treba da iznosi 35-45 centimetra.

## OPĆI SAVJETI:

### Važno upozorenje 1 - Biranje ruksaka

- Birajte ruksake za djecu koji su izgrađeni od laganijih tkanina. Težina torbe ne bi smjela biti veća od 10 do 15 posto djetetove težine, dno torbe ne bi trebalo biti ispod djetetovog struka, a vrh treba biti ispod linije ramena. Naramenice trebaju biti dovoljno široke (oko sedam cm) i mekane (obložene) kako se ne bi usijecale u ramena, a njihovu dužinu treba adekvatno prilagoditi. Nošenjem ruksaka na oba ramena smanjuje se pritisak na samo jednu stranu kičme. Teže stvari unutar torbe stavljati bliže kičmi.

### Važno upozorenje 2 - Fizička aktivnost i hrana

- Školarci bi trebalo da budu fizički aktivni najmanje jedan sat dnevno. Radi očuvanja vitalnosti koštano-mišićnog sistema neophodno je unositi bjelanjčevine životinjskog porijekla, namirnice bogate kalcijumom, vitaminima A, D i C. Tu spadaju mlijeko i mliječni proizvodi, zeleno povrće (špinat, brokule), mahunarke, riba i voće. Plivanje je izuzetno dobro, jer voda koja okružuje tijelo rasterećuje kičmu. Dok plivamo, naša kičma je pod deset puta manjim pritiskom nego kad hodamo.

### Važno upozorenje 3 - O ravnim stopalima

- Stopalo je građeno od 26 kostiju koje su međusobno spojene sa 33 zglobova i više od 100 mišića, tetiva i ligamenata. Do 18. mjeseca života ravna stopala su normalna pojava u djece, a prema mišljenju nekih autora i do 6. godine. Simptomi ravnih stopala su brže trošenje obuće koje nastaje zbog nepravilnog hoda, bol u donjim dijelovima nogu, petama, koljenima, kulkovima ili leđima, te otok na nogama.

**Služba za školsku higijenu, Institut za zdravlje i sigurnost hrane.**

## OKTOBAR - MJESEC ZAŠTITE OD POŽARA



U okviru programa Mjesec oktobar - mjesec zaštite od požara, predstavnici Službe civilne zaštite Općine Tešanj i firme Uno Tešanj, održali su stručno predavanje za profesionalne i dobrovoljne vatrogasce na temu: Gas sa aspekta opasnosti, sigurnosni uređaji u vozilu u sistemu BRC, postupak u slučaju opasnosti i praktični prikaz instalacije na vozilu. Također, u saradnji sa Policijskom stanicom Tešanj provedena je aktivnost na preventivnoj kontroli vozila koja su po Zakonu dužna posjedovati aparat za gašenje požara. Tokom kontrole provjereno je posjedovanje i ispravnost aparata (vrijeme servisiranja), a učesnicima u saobraćaju podjeljeni su i promotivni materijali na ovu temu.

## SANAČIJA KLIZIŠTA

Nakon provedene procedure javne nabavke, općinski načelnik Suad Huskić potpisao je ugovore za sanaciju šest klizišta na području općine Tešanj. Ugovori su potpisani sa firmama Dobojuptevi, Trans-Kop Rosulje, KM-Gradnja Miljanovci i Hajdić Maglaj. Ovo je nastavak aktivnosti na sanaciji klizišta nastalih 2014. godine, kao i nastavak provođenja preventivnih mjera zaštite i spašavanja. Vrijednost ugovora je 51.033,89 KM, a sredstva su osigurana u Budžetu Općine u okviru namjenskih sredstava za zaštitu i spašavanja.



## PROGRAM OPORAVKA OD POPLAVA

Načelnik Općine Zavidovići Hašim Mujanović održao je sastanak sa predstavnicima Razvojnog programa Ujedinjenih nacija u BiH (UNDP u BiH), te nevladinih organizacija Arbeiter-Samariter-Bund (ASB) i Hilfswerk International Austria (HWA). Povod sastanka bio je Javni poziv za odabir korisnika/ca pomoći za izgradnju stambenih jedinica uništenih ili oštećenih u poplavama 2014. godine. Sastanku su prisustvovali i Pomoćnik načelnika Službe za upravu civilnih poslova, službenik u civilnoj zaštiti, kao i predsjednik Komisije za odabir korisnika

pomoći sanacije i izgradnje stambenog fonda u projektu oporavka od poplava na području općine Zavidovići kojima su od strane predstavnika navedenih organizacija date određene smjernice u pogledu pristiglih prijava na Javni poziv. Ono što je značajno za ovaj Javni poziv jest da će odabrani korisnici/e biti uključeni u izradu Procjene potreba u oblasti ekonomskog razvoja, kroz koju će, za određeni broj korisnika/ca, biti osigurana pomoć u oblasti poljoprivredne proizvodnje i zapošljavanja u privatnom sektoru.

## OTVORENA NOVA POSLOVNA ZGRADA TVORNICE CEMENTA KAKANJ



Uz prisustvo mnogobrojnih zvanica, privrednika, radnika, osoba iz kulturnog i javnog života Bosne i Hercegovine, u fantastičnoj atmosferi otvorena je nova poslovna zgrada Tvornice cementa Kakanj. Tokom programa prikazan je promotivni video nove zgrade koju su projektirali duo Grozdanić iz studija Non-stop. Novi moderni dom vrhunski je i u potpunosti izgrađen od betona koji je vidljiv, a koncipiran je kao harmonično poslovno okruženje koje snažno povezuje cijeli poslovni krug ovog uspješnog kakanjskog giganta. Čista betonska fasada odiše

jednostavnim linijama koje simbolišu jednostavnost i praktičnost poslovanja kompanije. Zgrada se prostire na četiri etaže, od kojih je jedna podzemna i u funkcionalnom smislu obuhvaća sve administrativne kapacitete. Posebno je atraktivan i impresivan providni beton koji ukrašava pročelje na ulazu u zgradu. Ovim projektom beton dolazi do maksimalnog izražaja u estetskom i funkcionalnom smislu. U izgradnji su korišteni domaći materijali, posebno se vodilo računa o energetskej efikasnosti, zgrada posjeduje "A" certifikat energetske efikasnosti.

## MEMORANDUM O SARADNJI



U okviru projekta „Izgradnja kapaciteta nevladinih organizacija i odabranih općina/ gradova na izradi strategija/ akcionih planova za borbu protiv korupcije na lokalnom nivou“, u maloj sali općine Breza upriličeno je potpisivanje „Memoranduma o saradnji“. Projekt, uz podršku Američke agencije za međunarodni razvoj u BiH (USAID), realizuje Antikorupcijska mreža u BiH – ACCOUNT, potpomognuta sarajevskim Udruženjem INFOHOUSE i Udruženjem za lokalne razvojne inicijative (ALDI) iz Goražda. U ime ACCOUNT-a, Memorandum o saradnji potpisala je direktorica Udruženja INFOHOUSE Dženana Alađuz, dok je ispred općine Breza potpisnik bio pomoćnik načelnika Salih Hasanspahić. Na ovaj način Breza se uključila u izradu Strategije za borbu protiv korupcije na lokalnom nivou. Saradnja se realizuje u okviru aktivnosti Antikorupcijske mreže u BiH - ACCOUNT koja okuplja preko 70 organizacija civilnog društva u BiH. Potpisivanju Memoranduma prisustvovali su Amra Softić iz INFOHOUSE-a, Meliha Gačanović i Azra Borovac iz nevladine organizacije ALDI, pomoćnica načelnika Meliha Beširević, kao i zaposlenici općine Breza Almir Dervišević i Safet Zahirović.



## INVESTICIJE U DRVNOJ PROIZVODNJI

Općinu Zavidovići posjetili su Asim Khan iz Indije, te Edin Šabanović i Raif Turko iz Acing Sarajevo. Predmet njihovog interesovanja je mogućnost pokretanja drvne proizvodnje, odnosno proizvodnje namještaja i drugih produkata od drveta. Općinski načelnik održao je sastanak s njima, a nakon toga izvršili su obilazak dijela „Stoličare“ koji bi

mogao biti predmet zakupa, kao i drugih privrednih subjekata koji su predmet prodaje. Potencijalni investitori obavili su razgovor sa stečajnim upraviteljem Hamdijom Muratovićem koji ih je upoznao sa uslovima i načinom zakupa, odnosno prodaje neiskorištenog dijela stoličare. U narednom vremenu očekuje se realizacija projekta.



## STIPENDIJE TEŠANJ

Na prijedlog načelnika Suada Huskića, Vijeće općine Tešanj donijelo je Odluku o izdvajanju 350.000 KM za stipendiranje studenata za novu akademsku 2017./2018. godinu.

- Naša podrška stipendiranju studenata je prepoznatljiva, te ćemo i u novoj akademskoj godini biti na visini očekivanja. Ove godine uvodimo neke novine za koje smatramo da su korisne kako za studente, tako i za lokalnu zajednicu. Deficitarna zanimanja će imati veće stipendije, a od iduće godine, zanimanja, odnosno profesije za koje imamo veliki broj nezaposlenih osoba neće biti stipendirana u prvoj godini studija. Nažalost, odsustvo jasne politike

u visokom obrazovanju u pogledu broja i vrste fakulteta dovodi nas do toga da mladi biraju fakultete nakon čijeg završetka ne mogu naći posao u struci. Zbog toga ćemo mi podržavati ono što stvarno treba tržištu, a ne službama za zapošljavanje, kazao je općinski načelnik Suad Huskić.

Prošle godine potpisan je ugovor o stipendiranju sa 372 studentice i studenta. Praksa stipendiranja studenata u Općini Tešanj započela je školske 2008./2009. godine. Broj stipendista se povećavao, tako da je u posljednje četiri godine, za ovu svrhu u općinskom budžetu izdvojeno oko 2 miliona KM.

# PROMOVISANI DIPLOMANATI I MAGISTRI



Osma zajednička promocija završenika prvog i drugog ciklusa studija Univerziteta u Zenici, na kojoj je promovisano 493 diplomanata i 49 magistara od čega 47 nauka i dva struke, održana je u Gradskoj areni "Husejin Smajlović" u Zenici. Oni su pred rektorom UNZE Damir Kukićem položili svečanu izjavu nakon čega je uslijedilo tradicionalno bacanje kapa u zrak i slavlje. Promociji je prisustvovalo oko 3.000 ljudi, članova porodica diplomanata i njihovih prijatelja. Nagrade "Povelja dekana" dobio je 31 studenat koji su u prethodnoj studijskoj godini bili najbolji na svom fakultetu, odnosno ostvarili prosjek ocjena iznad 8,00. To su: Eldina Saletović, II godina, prosjek 8,16, Anesa Ključanin, III godina, 10,00, Fatima Baltić, IV godina, 9,70 i Dženana Smajić, IV godina, 9,70 (Metalurško-tehnološki fakultet), Andrea Misilo, I godina, 8,83, Aida Bušatlić, II godina, 8,33, Amina Čurić, III godina, 9,92 i Zlatan Cogo, IV godina, 8,33 (Mašinski fakultet), Larisa Mahmić, I godina, 9,50, Ajla Hekić, II godina, 9,50, Nadira Čeliković, III godina, 9,81 i Kasema Ibrahimović, IV godina, 10,00 (Filozofski

fakultet), Amra Dedić, I godina, 9,10, Šeherzada Šakić, II godina, 9,60, Berina Delić, III godina, 9,60 i Mediha Karić, IV godina, 9,70 (Ekonomski fakultet), Ajša Luković, I godina, 9,82, Adnan Avdagić, II godina, 9,69, Mirza Imamović, III godina, 9,15 i Ajla Delić, IV godina, 9,43 (Pravni fakultet), Adis Šišić, I godina, 9,06, Dženana Hamzić, II godina, 8,23 i Berina Isaković, III godina, 9,08 (Medicinski fakultet), Sedina Murtić, I godina, 9,00, Eldar Čurić, II godina, 9,70, Lejla Goralija, III godina, 8,60 i Sakib Bitić, IV godina, 9,80 (Politehnički fakultet), Amna Muratović, I godina, 9,83, Mersad Čobo, II godina, 9,64, Eniz Patković, III godina, 9,92 i Berina Mehić, IV godina, 10,00 (Islamski pedagoški fakultet). Dodijeljene su i četiri najveće nagrade "Povelja rektora", koje se dodjeljuju najboljima koji su tokom ukupnog studija imali najbolji prosjek. Dobili su ih Berina Mehić, studentica IV godine IPF-a sa prosjekom ocjena 10,00 te sa drugog ciklusa studija Azra Halilović, Amna Karić i Indira Husić, sve sa prosjekom ocjena 9,80 na Metalurško-tehnološkom fakultetu.



## ZENICI BFC CERTIFIKAT

Grad Zenica pridružio se grupi općina i gradova naše zemlje sa BFC certifikatom. Prije Zenice, certifikate je dobilo deset općina i gradova iz FBiH i osam iz RS-a. Predsjednik BFC-a mreže FBiH i član regionalnog BFC savjeta, uručio je gradonačelniku Fuadu Kasumoviću potvrdu o dobijanju BFC certifikata i BFC tablu za zgradu Gradske uprave. - BFC certifikacija gradova i općina za povoljno poslovno okruženje u jugoistočnoj Evropi je program za poboljšanje kvaliteta usluga i informacija za uslove poslovanja lokalne samouprave. To je svojevrsan putokaz ili iskustvo za pripremu dobre poslovne klime i uvođenje standarda efikasne i transparentne lokalne administracije, kazala je Amra Mehmedić, šefica Odsjeka za lokalni i ekonomski razvoj pri kabinetu gradonačelnika i koordinatorica BFC tima Grada Zenice. Kasumović je rekao da je ovo obaveza lokalne zajednice u pogledu kvalitete

## 500 GODINA DANA REFORMACIJE U ZENICI



U organizaciji Biblijske protestantske crkve u Zenici je upriličena proslava 500 godina Dana reformacije u Muzeju grada, kao i predavanje na Filozofskom

fakultetu Univerziteta u Zenici. - Naša crkvena zajednica se trudi da na neki način ovaj jubilej, koji je dosta velik, obilježi na pravi način, kazao je Dario Kapin, pastor Biblijske protestantske crkve u Zenici. On je objasnio da je 2017. godina na neki način istorijska za BPC, da su se nakon tri godine borbe u Zenici uspješno izborili da njihov baner bude izvješten u gradu za proslavu Dana reformacije, čime je "Zenica proširila svoju multikulturalnost". Dodao je da se bore da se ne smatraju ostalima iz razloga što protestanti u svijetu čine sedminu čovječanstva te da se zalažu za građansku BiH, a samim tim i slobodu vjere u svakom

pogledu. Joshua Irby je Amerikanac koji posljednjih osam godina živi u Sarajevu zajedno sa suprugom Taylor i njihovo četvero djece. Predsjednik je udruženja Fokus koje radi sa mladima, te potomak Adeline Pauline Irby, Engleskinje koja je sredinom 19. vijeka promijenila Sarajevo. Osnovala je zavod kako bi se pospješilo opismenijavanje i sveukupno obrazovanje domaćih djevojaka. Jedna ulica u centru Sarajeva već decenijama nosi ime Mis Irbina kao znak zahvalnosti građana Sarajeva za njen dobrotvorni rad. Joshua je autor knjige "Susret sa Miss Irby" koju je predstavio u Zenici.

Predmet osiguranja [na novu vrijednost]

PRESTIGE

TREND

BASIC

Gradivinski dio objekta	1.500,00 KM/m <sup>2</sup>	1.500,00 KM/m <sup>2</sup>	1.500,00 KM/m <sup>2</sup>
Stvari kućanstva	200,00 KM/m <sup>2</sup>	300,00 KM/m <sup>2</sup>	350,00 KM/m <sup>2</sup>
Odgovornost prema trećima	x	3.000,00 KM	5.000,00 KM
Boje na zidu i građevinskoj stolariji, podne, zidne i stropne obloge	35,00 KM/m <sup>2</sup>	70,00 KM/m <sup>2</sup>	100,00 KM/m <sup>2</sup>
Stakla na vratima i prozorima stana	1.000,00 KM	2.000,00 KM	3.000,00 KM
Gotov novac, nakit, umjetnički predmeti, zbirke, vrijednosni papiri i ostale stvari posebne vrijednosti	1.000,00 KM	3.000,00 KM	5.000,00 KM
Stvari kućanstva u ostalim prostorijama stana (tavan, podrum...)	5% od s.o.	8% od s.o.	10% od s.o.
Siete na građevinskim dijelovima stana uslijed izvršene ili pokušane krađe	3.000,00 KM	3.000,00 KM	3.000,00 KM

Obračun premije [godišnja premija]


1,90 KM/m<sup>2</sup>      2,90 KM/m<sup>2</sup>      4,90 KM/m<sup>2</sup>



"ISKORISTITE AKCIJU"

Ugovorite policu osiguranja stana ili kuće uz 10% popusta.

- putem portala [www.bsosavjetnik.ba](http://www.bsosavjetnik.ba)
- putem call centra na besplatni telefon 0800 200 50
- na svim BSO prodajnim mjestima uz predočenje ovoga kupona.



*Basic* od 1,90 KM/m<sup>2</sup>  
[pokriva 15 rizika]

*Trend* od 2,90 KM/m<sup>2</sup>  
[pokriva 22 rizika]

*Prestige* od 4,90 KM/m<sup>2</sup>  
[pokriva 31 rizik]

FAMILY PAKETI  
ZA OSIGURANJE  
VAŠEG DOMA  
ODABERITE svoju  
kombinaciju



**BSO**  
BOSNA SUNCE OSIGURANJE





## Gitare po uzoru na čuveni **FENDER STRATOCASTER**

Travničanin Edhem Edo Kozar već nekoliko godina uspješno pravi električne gitare, a po svim karakteristikama i materijalima koji su ugrađeni u ove instrumente, to je čuveni „Fender Stratocaster“. Ljubav prema muzici i sviranju gitare Edhem gaji još od šezdesetih godina prošlog stoljeća.

– Prva gitara koju sam imao kao dijete bila je ručno pravljen. Tada nije bilo mogućnosti da se napravi nešto ovakvo. Uvijek je bila želja, ali to je bilo nemoguće jer nije bilo tehničke dokumentacije. Danas je to sve dostupno preko interneta i ja danas ostvarujem svoj san. Uz sve to, potrebna je vještina koja se brusi godinama. Bitan je i materijal, otkriva nam Edo. Kod nabavke materijala u početku je bilo lutanja pa su elektronika i hardver nabavljani „iz druge i treće ruke“ po znatno višim cijenama. Danas materijal nabavlja od vrhunskih dobavljača. Tako materijal za gitare koje nastaju u Turbetu kod Travnika stiže iz Njemačke, Holandije, Portugala, a elektronika stiže iz Hong Konga. Kada se sve ovo kupi, slijedi pravo majstorstvo te sati i sati rada i preciznosti. Za izradu treba mnogo vremena i strpljenja. Jednu gitaru izrađujem između mjesec i četrdeset dana. To je cjelodnevni rad. Ja sam

penzioner pa sam prestao računati vrijeme na sate. To je ručna proizvodnja i vrlo je zahtjevno. Ljudske ruke su najsavršeniji alat u svemiru, a to je razlog što su ručno rađene gitare više cijenjene od industrijski pravljenih, naglašava Edo. Ova gitara mora imati specifičnu težinu koja se kreće između 3.900 i 3.950 grama. Ukoliko je lakša ili teža, znači da gitara nije uredu. Za izradu gitare koristi se više vrsta drveta: jasen, javor, jošika te specijalni lakovi. Iako se premazuje u prosjeku devet puta, sloj laka je milimetarski tanak. Veoma važno je voditi pažnju o vlažnosti drveta koje se koristi.

### Ljubav i strast

– Moje gitare su u rukama držali legendarni muzičari kao što su Darko Rundek, Seid Memić Vajta i još neki koje veoma cijenim. Još usvajam proizvodnju i radim ovo iz ljubavi i strasti. Mada postoji i interes kupaca. Neki dan je jedna prodana u Travniku. Bio sam nedavno i u Zadru na promociji i moje gitare su svirali majstori ovog instrumenta. Nisam opterećen ni zaradom ni profitom, kaže nam Kozar.

### Svemirski dizajn

Edhem tvrdi da je to jedno od najvećih dostignuća tehnike i dizajna. I ako nešto treba da se pošalje u svemir kao dostignuće, onda je to sigurno gitara „Fender Stratocaster“. Ovaj muzički instrument, popularno zvan samo „Strat“, vrlo je poznat model električne gitare, konstruirane 1954. godine. Proizvodi se odonda do danas i predstavlja jedan od najprepoznatljivijih modela za pojam električna gitara općenito. Dizajn „Stratocastera“ danas se smatra pravim klasikom u industrijskom dizajnu gitara. Edhemove gitare vrhunske izrade.

Cijene gitara koje proizvodi Edhem Edo Kozar kreću se od 1.000 do 2.500 KM. Zavise od komponenti koje su ugrađene u gitare.



# STR MEGA - PLAST

## VITEZ

- ~ protuprovalna vrata
- ~ garažna vrata
- ~ ulazna vrata
- ~ stolarija po dimenziji
- ~ ugradnja
- ~ prevoz



Mega -Plast Vitez je specijalizirana za izradu, distribuciju i ugradnju PVC prozora i PVC vrata. U ponudi imamo tri profila koja nudimo kao standardne mjere uz najpovoljniju cijenu na ovim prostorima, te mogućnost izrade po vašim mjerama.

Mega- Plast Vitez nudi kvalitetnu i veoma povoljnu njemačku stolariju tipa Salamander sa dva stakla i dva dihtunga te Salamander profil sa 3 dihtunga i 3 stakla. Uz sve ovo navedeno u ponudi imamo sobna vrata standardnih dimenzija tipa Lesomal za 90 KM po komadu kao i vrata tipa Kraft master za 100 KM po komadu. Našu ponudu smo upotpunili ponudom sobnih vrata tipa CPL folije koja radimo isključivo po vašim mjerama i vašem odabiru. Nudimo 12 dezena i 4 oblika štoka uz obezbjeđeno mjerenje i ugradnju.

Mega- Plast Vitez nudi i kvalitetna sekciona garažna vrata prve klase sa obezbjeđenom montažom i servisom, kao i mogućnost izbora boje. **Uz malo novca do novih prozora i vrata u Mega -Plast Vitez.**

STR MEGA-PLAST Vitez; VI. Krunoslav Baškarad; Mob.: 063 364 650; Tel./Fax: 030 712 426



## NOVI CITROËN C3

Live Pure Tech 68 BVM

KLIMA UREĐAJ

AUDIO SISTEM SA BLUETOOTH®

UPOZORENJE O NENAMJERNOM PRELAZENJU CRTE

PREPOZNAVANJE ZNAKOVA OGRANIČENJA BRZINE

TEMPOMAT I LIMITATOR BRZINE



ZA

19.190,00 KM

+4 GODINE  
GARANCIJE

UPOZNAJ GA UŽIVO

CITROËN preporučuje TOTAL. Ponuda važi do 31. 12. 2017. samo kod ovlaštenih distributera Citroëna u BiH. Cijene u oglasu se odnose na: Novi Citroën C3 Live Pure Tech 68 BVM koji između ostale opreme uključuje klima uređaj, audio sistem sa Bluetooth®, upozorenje o nenamjernom prelaženju crte, prepoznavanje znakova ograničenja brzine, tempomat i limitator brzine. Ponuda uključuje i 4 godišnje garancije koja podrazumijeva 2 godišnje fabričke garancije i 2 godišnje prodajne garancije (ive skupa 48 mjeseci) do ograničenja 80.000 km. Comb. potrošnja 3,2-4,9 l/100 km. Cijena sa PDV-om. Navedene cijene već uključuju redovni popust. Slike vozila su simbolične. Više informacija na [www.citroen.ba](http://www.citroen.ba)



[citroen.ba](http://citroen.ba)

OVNAK d.o.o. Vitez • AUTOCENTAR OVNAK

Poslovni centar PC96, 72250 Vitez • Tel.: 030 717 106 • Fax: 030 717 107 • [autocentar@ovnak.com](mailto:autocentar@ovnak.com)

## ŽNK ČELIK



Nogometašice Čelika narednog vikenda igraju posljednju utakmicu jesenjeg dijela takmičenja i to u gostima. ŽNK Čelik trenutno zauzimaju 4. mjesto na tabeli Prve lige FBiH. Nakon odigravanja ove utakmice slijedi borba za opstanak kluba, a onda i borba za povratak u Premijer žensku nogometnu ligu BiH. - Da bi ostvarili cilj potrebna je pomoć svih građana i ljubitelja ženskog nogometa, ističu iz ovog kluba. Do 20. februara 2018. godine ŽNK Čelik pokreće akciju za prikupljanje donacija. Pozivamo što više članova da uplatom od 10 KM pomognu našem cilju, a ujedno svi zajedno spasit ćemo tradiciju ženskog nogometa u Zenici, poručili su na kraju.

## PORAZ RAGBIJAŠA OD MALTE



Bosanskohercegovačka seniorska ragbi reprezentacija poražena je na startu kvalifikacija u okviru Evropskog prvenstva, Konferencije 1 Jug. Na domaćem terenu poražena je od Malte sa 20:52. U prvom poluvremenu gosti su imali vodstvo 8:40. U nastavku bh. ragbijaši zaigrali su bolje, ali oslabljeni za šestoricu igrača iz inostranstva, koji nisu nastupili zbog privatnih i obaveza na poslu, nisu mogli pružiti dostojan otpor kvalitetnijim protivnicima. Susret je završen rezultatom 20:52 za Maltu. U našem timu poentirali su Kadić, Subašić i Oruč.



## PREGOVORI ZA PREUZIMANJE ČELIKA U TOKU

Nakon što je došla radna verzija ponude "HAN Group", grupacije investitora koji žele investirati u NK "Čelik", u Sarajevu je održan sastanak pregovaračkog tima sa predstavnicima investitora. Razlog je bio precizno definisanje stavki iz grube, radne verzije Ugovora koji nije u cjelosti obuhvatio sve ono što je potrebno da bi zadovoljio obje strane. Pošto je u pitanju veliki proces u koji moraju biti uključeni investitori, NK "Čelik" i Grad Zenica, razgovaralo se o modelu izrade nacrtu Ugovora u kojem bi se definisale sve stavke i koji bi se u konačnici stavio na glasanje pred Skupštinu Kluba. Investitori će u nacrtu Ugovora tražiti da im se ustupi 70% upravljačkih prava u sportskom segmentu Kluba, što u konačnici znači mjesto generalnog direktora, sportskog direktora, predsjednika Upravnog odbora, 70% tijela u Upravnom odboru i 70% tijela u Nadzornom odboru, ne žele preuzeti dugovanja nastala prije njihovog ulaska u Klub i traže stadion "Bilino polje" na besplatno korištenje bez poslovnih prostora. Što se tiče obaveza investitora prema NK "Čelik", obavezaće se da neće mijenjati ime, grb i boje Kluba, da će u Klub ulagati

od 1 milion do 2 miliona eura godišnje, u zavisnosti od potreba Kluba, da će Klub u prvoj godini svog dolaska ostaviti u Premijer ligi a da će se već naredne boriti za vrh tabele i izlazak na evropsku scenu. Također su se obavezali da će oformiti fudbalsku akademiju i da će na poznatom terenu "Šljaka" na Kamberovića polju izgraditi dva fudbalska terena sa reflektorima za potrebe omladinskog pogona.

Pošto je stadion "Bilino polje" i teren "Šljake" na Kamberovića polju u vlasništvu Grada Zenice, ovaj problem bi trebao riješiti Grad kroz odluke Gradskog vijeća. Na Gradu ostaje i otplata poreskog duga kroz reprogram, a pare za otplatu bi se obezbijedile od najamnina poslovnih prostora na stadionu. Što se tiče otpisa dugova prema javnim preduzećima, Gradsko vijeće je već donijelo odluku o istom. Ostaje model finansiranja Kluba preko kojeg bi se riješila dugovanja prema dobavljačima i trećim licima i dogovoreno je da će dio novca od ulaznica i sponzora biti iskorišten za otplatu dugova. I na kraju ostaje problem transparentnog poslovanja jer je Klubu blokiran račun.

## RUKOMETAŠICE KRIVAJE NEZAUSTAVLJIVE

Rukometašice Krivaje u okviru šestog kola Premijer lige BiH gostovale su u Hadžićima gdje su upisale novu prvenstvenu pobjedu, rezultatom 28:35. Nakon što su na domaćem terenu u okviru zaostalog susreta petog kola savladale ekipu Mire iz Prijedora, Zavidovićanke su sjajnom igrom došle

do novih prvenstvenih bodova. Ekipa Krivaje u ovom susretu u potpunosti je opravdala ulogu favorita. Od samog početka susreta gostujuća ekipa imala je rezultatsku prednost koja je u pojedinim dijelovima susreta iznosila i plus 11 golova razlike, a konačan rezultat glasilo je 28:35.

# USPJEH PEZERA

Završena je atletska sezona kada su u pitanju nastupi na otvorenom, a narednih mjeseci slijede takmičenja u dvorani. Ova sezona za atletičare iz BiH može se kazati da je uspješna, iako na Svjetskom prvenstvu niko od trojice Tuka, Alić i Pezer nije izborio nastup u finalu. Ipak, najvrjednije rezultate u 2017. godine ostvario je 23-godišnji bacač kugle Mesud Pezer. On je prije svega ove godine oborio 33-godine star rekord Zlatana Saračevića u ovoj disciplini. Pezer je na prvenstvu Republike Srpske održanom na Sokocu, bacio kuglu 21,40 cm, te tako srušio prijašnji rekord Saračevića koji je iznosio 21,11 cm. Osim novog rekorda BiH, Pezer je pobijedio na zimskom bacačkom kupu Las Palmas u Španiji s hicem 20,69 cm, također bio je sedmi na Evropskom dvoranskom prvenstvu u Beogradu,



prvaka Balkana na otvorenom, te drugi u dvorani na Balkanu. Na gala večeri u Staroj Zagori u Bugarskoj na kojoj su proglašeni najbolji atletičari u 2017. Godini, od strane Balkanske atletske federacije, Mesud Pezer je primio stakleni pehar namijenjen za najboljeg atletičara Balkana u ovoj godini. Sigurno da je i ovo priznanje nagrada za sjajne rezultate ovog Zeničanina, od kojeg se očekuje da narednih godina osvaja medalje na najvećim takmičenjima.

# USPJEH RITMIČARKI IZ VISOKOG

Djevojčice iz kluba ritmičke gimnastike "Visoko" iz Visokog boravile su na Zlatiboru gdje su učestvovali na međunarodnom turniru "Gracija cup" u organizaciji ritmičkog kluba "Gracija" iz Užica. Na ovom turniru učestvovalo je devet klubova, a takmičarke KRG "Visoko" su se predstavile u grupnim i individualnim vježbama, raspoređenim u A, B i Blight programe. Trenerice kluba ističu kako su zadovoljne postignutim rezultatima, s obzirom da je nekim od djevojčica ovo bilo prvo takmičenje van granica BiH. Ističu kako se pripremaju za četiri turnira koja će se održati u novembru.



# GMS SPORT

Jack  
Wolfskin

Joma®

S  
salomon

NORTHLAND  
PROFESSIONAL

UNITED COLORS  
OF BENETTON.

GMS  
SPORT

GMS sport; Poslovni centar 96, 72250 Vitez; BiH; Tel.: 030 713-306

# GASTRO KUTAK

## PITA KROMPIRUŠA

### Sastojci:

- 500 gr brašna **KLAS ZA PITE I KOLAČE**
- 300 ml mlake vode za zakuhanje
- 1 kg krompira
- 1 glavica luka
- So, vegeta, biber
- 200 ml mlijeka
- 2 kašike biljnog masla/ maslac

### Priprema:

- Zakuhati jušku te ostaviti malo da odstoji, a zatim je razviti i razvući.
- Prethodno isjeckati krompir i dodati so, vegetu i biber po želji. Sve izmješati. Na razvučenu jušku posipati isjeckani krompir i zavijati u zvrkove.
- Pitu peći na jakoj vatri dok ne porumeni, a zatim zaliti vrelom vodom u kojoj smo stavili malo soli. Pitu vratiti ponovo u rernu da ukuha voda. Nakon toga pitu zaliti mlijekom u kojem smo prethodno rastopili maslo ili maslac.



Azira Selimović,  
Zenica

## SLADOLED TORTA

### Sastojci:

- 10 jaja
- 8 kašika brašna **KLAS ZA PITE I KOLAČE**
- 26 kašika šećera
- 1 puding od vanilije
- 1 puding od čokolade
- 2 čokolade za kuhanje
- 250 gr margarina
- 2 vanilina šećera
- 150 ml vrhnja za kuhanje

### Kora:

- 10 bjelanaća
- 10 kašika šećera
- 8 kašika brašna **KLAS ZA PITE I KOLAČE**

### Priprema:

- Umutiti bjelanca i šećer u čvrsti snijeg, zatim dodati brašno te ponovo umutiti i peći na 150 °C.
- FIL 1**
- 10 žumanaca i 10 kašika šećera umutiti i kuhati na pari. Kad se ohladi umutiti margarin.
- FIL 2**
- 200 ml vode 1 puding od vanilije, 3 kašike šećera i vanilin šećer umutiti i prokuhati na pari.
- FIL 3**
- 200 ml vode, 1 puding od čokolade, 3 kašike šećera vanilin šećer umutiti i prokuhati na pari i dodati jednu čokoladu za kuhanje. Kada se ohladi **FIL 1** podijeliti na dva dijela i dodati jednu polovinu u **FIL 2**, drugu polovinu u **FIL 3**. Na pečenu koru slažemo **FIL 2**, zatim **FIL 3** i premažemo čokoladnom glazurom.
- **COKOLADNA GLAZURA**
- 100 gr čokolade za kuhanje rastopimo na laganoj vatri u 150 ml vrhnja za kuhanje.




Alisa Bojić,  
Vitez

Šaljite nam vaše  
recepte sa Klas  
proizvodima.  
Najsretnije očekuje  
poklon paket Klas  
proizvoda.



## PROMOVISANA KNJIGA 50 GODINA BH POP ROCKA



U okviru 6. Acoustic festa Travnik 2017 upriličena je promocija knjige "50 godina BH pop rocka", autora Amira Misirlića. Žurnalista, publicista i bh. muzički kritičar Amir Misirlić predstavio je knjigu, odnosno leksikon pod nazivom "50 godina bh pop-rocka", koji je svojevrsan ažurirani nastavak izdanja iz 2004. godine. Na preko 300 stranica autor donosi brojna imena muzičara, muzičkih grupa i pojmova u pet povezanih cjelina podijeljenih po dekadama.

Kroz razgovor sa Taikom Ganićem, muzičarom i producentom iz Travnika, Misirlić je prisutnima iznio niz zanimljivih podataka i anegdota, ali i najavio neke nove knjige.

-Pišem biografiju Zorana Redžića i tu ću definitivno otkriti zašto je Željko Bebek otišao iz Bijelog Dugmeta. Tu će čitaoci imati priliku da vide zabranjeni omot za album „Bitanga i princeza“ o kojem su svi pričali, a niko ga nije vidio. Takođe, ću otkriti i kome je povećana pjesma „Blues za moju bivšu dragu“, kazao je autor Misirlić.

Misirlić je istaknuo kako BiH i danas ima izuzetne muzičare i autore, ali da je naša zemlja pod „kulturološkom okupacijom“.

-U bivšoj državi diskografija je bila treća izvozna grana u BiH. Danas smo pod „kulturološkom okupacijom“, a nekada smo diktirali trendove. Talenat imamo, ali sistem ne stoji iza toga, kazao je Misirlić. Travničku promociju bila je druga, nakon sarajevske, a na svoj način uljepšali su je nastupima Azra Seferović, Eman Ganić, te članice Plesnog studija „Prijatelji djece Maya“.



## AMIRA MEDUNJANIN ODUŠEVILA TRAVNIČANE NA 6. ACOUSTIC FESTU

Dvosatni koncert Amire Medunjanin, izvrsne interpretatorke sevdalinki u Travniku je otvoren 6. Acoustic Fest Travnik 2017. U prepunoj sali Centra za kulturu publika uživala i pjevala sevdalinke za jedno sa Amirom Medunjanin i Boškom Jovićem na gitari. Travnički koncert Amira Medunjanin pamtit će i po pratnji hora iz publike. Na početku koncerta ona je pozvala publiku da slobodno pjeva, ali nakon nekoliko pjesam opazila je da ima „malo profesionalniju podršku“ iz publike. Hor se javljao baš u onim dijelovima pjesme gdje treba! - U dvorani ima neki hor! Sigurna sam u to i preoznajem izvrsne glasove!, kazala Amira. Kako je koncert tekao sve više je i bila ubjeđena u to. Zaista koncert su pratile i publike i „malo pomagale“ članice Ženskog gradskog hora centra za kuluru Travnika, ali veliki broj akademskih muzičara koji su došli pogledati ovaj izvrstan koncert.



- Apsolutno savršena noć, divni ljudi, divna dvorana. Općinjena sam. Travnik, zaista od srca veliko hvala, napisala je na svom Instagram profilu.

### Travnički ćevapi

Amira je na početku koncerta priznala je da je prekršila jedno svoje pravilo, a to je da ne jede ništa prije koncerata. Ovaj put probala je travničke ćevape. Morala sam da se uvjerim jel to mit i legenda ili su to ti najbolji ćevapi. Rekla sam pojest ću dva. Boga mi pojela sam osam. Neću reći jesu li bolji od sarajevskih ćevape, valja mi se vratiti u Sarajevo, povjerala se Amira publici u travničkom Centru za kulturu.

### Festival velikih muzičara

Acoustic Fest Travnik (AFT), prelijepi muzički događaj već šest godina uspješno organizuje Taik Ganić, a proteklih godina gosti AFT-a bili su: Damir Imamović (2012. godine), Divanhana (2013. godine), Tajni gaz (2014. godine), Vlatko Stefanovski (2015. godine) i Divlje Jagode (2016. godine).

# OBAVEZNA BEAUTY RUTINA PRIJE HLADNIH DANA: EFIKASNE MASKE OD KAFE ZA KOŽU I KOSU

Pripremite na vrijeme i krenite sa njegom dok temperature ne padnu ispod nule... Hladnoća može narušiti vašu ljepotu, a kako biste zaštitili lice i kosu od negativnog uticaja niskih temperatura, tu vam u pomoć priskače kafa. Od popularnog jutarnjeg napitka sami možete napraviti potpuno prirodne i ljekovite proizvode za njegu kože i kose.

## Njega kose

Skuhajte blagu kafu i ohladite je, pa nanesite duž cjele kose i skupite ispod plastične kاپice. Nakon 20 minuta isperite kafu iz kose običnom vodom i primjetit ćete da vam kosa izgleda sjajnije, a rješit ćete se i viška masti.

## Maska za lice

Za izradu ove maske morat ćete se ipak potruditi malo više nego kod njege kose, a trebaće vam sledeći sastojci:

- dvije kašičice mljevene kafe
- dvije kašičice kakaa u prahu
- tri kašičice punomasnog mlijeka ili jogurta
- kašičica meda.

Navedene sastojke ubacite u istu posudu i mešajte ih dok ne dobijete homogenu smjesu. Masku zatim nanesite na lice i uradite laganu masažu kako biste podstakli bolju cirkulaciju. Nakon 15 minuta masku s lica isperite mlakom vodom i nanesite omiljenu hidratantnu kremu.



Jesen  
LJEPŠE  
MIRIŠE UZ  
**cm**  
CENTRUM MODA

-25%



VERSACE  
Yellow Diamond  
edt 30 ml

90<sup>75</sup>  
68<sup>10</sup>

-25%



HUGO  
Just Different  
edt 40ml

94<sup>80</sup>  
70<sup>95</sup>

-30%



DAVIDOFF  
Cool Water  
woman edt 30 ml

67<sup>80</sup>  
47<sup>45</sup>

-25%



NINA RICCI  
L'eau  
edt 30 ml

66<sup>70</sup>  
49<sup>60</sup>

-40%



CALVIN KLEIN  
Be edt 50 ml

74<sup>90</sup>  
44<sup>95</sup>

-50%



AZZARO  
Chrome United  
edt 50 ml

108<sup>30</sup>  
54<sup>20</sup>

-20%



SERGIO  
TACCHINI  
Smash Men  
edt 50 ml

56<sup>70</sup>  
44<sup>85</sup>

-30%



BRUNO BANANI  
Magic Woman  
edt 30 ml

44<sup>75</sup>  
31<sup>30</sup>

-30%



MEXX  
Black man  
edt 30 ml

33<sup>95</sup>  
23<sup>80</sup>

# JP „Parking servis“ Zenica

## IZGRADNJA PARKINGA NA STAROJ PIJACI

Javno preduzeće “Parking servis” Zenica je od posebnog društvenog interesa za Grad Zenicu. Preduzeće je osnovano na temelju Odluke Vijeća općine Zenica od 29.11.2001. godine i sudski registrirano pod prvobitnim nazivom J.P. “Parkinzi” Zenica. Preduzeće je prilikom osnivanja, a na osnovu Elaborata o osnivanju preduzeća, preuzelo dio poslova JP “Komrad” Zenica, koji su se odnosili na upravljanje i gazdovanje parking prostorima, kao i zaposlene radnike iz JP “Komrad” Zenica i započelo sa radom 1. januara 2002. godine u iznajmljivom prostoru hotela “Rudar” u Zenici. Dogovor oko prava i obaveza između JP “Komrad” i JP “Parkinzi” okončan je usvajanjem Odluke o Diobenom bilansu 26.12.2003. godine. Sjedište preduzeća je prebačeno u vlastitom objektu u poslovnoj zgradi na adresi Zacarina broj 23. u Zenici, koja je kupljena po diobenom bilansu od JP “Komrad”, te su u istu za adaptaciju uložena značajna finansijska sredstva. Sjedište preduzeća odnedavno je u ulici Muhameda Seida Serderavića 1, u zgradi na Staroj pijaci u kojoj je nekad bila smještena gradska inspekcija. U krugu preduzeća je parkiralište namijenjeno za odlaganje nepropisno parkiranih vozila i za noćno čuvanje. Prema riječima Envera Talića, direktora JP “Parking servis”, u fazi je nabavka 20 satova za naplatu koji će biti postavljeni na 20 lokacija u dogovoru sa Gradskom upravom. Uloženi novac bi se trebao vratiti najduže za četiri godine. Cilj preduzeća je povećati broj parkinga u Zenici. U dogovoru sa gradonačelnikom i resornim službama uradiće se elaborat na osnovu kojeg će se dodjeljivati kasnije lokacije parkinga. Imaju namjeru uvesti prekršajne naloge, kao i uvesti i SMS naplatu. U pregovorima su oko načina SMS naplate sa telekom operaterima.



- Odlučili smo se raditi horizontalnu i vertikalnu signalizaciju i nismo se pokajali. Kupili smo mašinu da je koristimo za naše parkinge da obilježavamo i markiramo, a da tražimo sebi posla. Počeli smo dobijati poslove prije sedam godina. Radimo horizontalnu i vertikalnu signalizaciju od tada svake godine




za grad. Kasnije smo radili u drugim gradovima širom Bosne i Hercegovine i na južnoj magistrali u Srbiji. Uglavnom, ova mašina nam se višestruko isplatila, istakao je Talić. Garaže su date JP Parking sevisu na upravljanje od strane Gradske uprave. Garaže su građene prije 40-50 godina i to za vrstu vozila koja su bila u to vrijeme, manja vozila. Zbog toga su predložili

da su kod dijela garaža koje su takvog tipa sruše unutarnji zidovi i naprave parking garažna mjesta. Tako će biti i na Talića brdu ukoliko se sanira plato. Garaže bi služile isključivo za stanare da mogu po povlaštenim cijenama držati svoja vozila u noćnim i ranim jutarnjim satima a po danu bi bila to parking mjesta. U ulici Kralja Tvrtka, u podzemnim garažama u čeličnom soliteru nabavljena su elektronska selekciona vrata gdje će biti ugrađen program sa čip karticama. Svaki korisnik će imati svoju karticu. Vjerovatno će u sve tri podzemne garaže kojim upravljaju biti postavljena ovakva vrata.

Nisvet Hukić, zamjenik direktora JP „Parking servis“ Zenica je objasnio da je projekat parking mjesta na Staroj pijaci završen. Njegov cilj je rješavanje problema parkinga centralnog dijela grada. Radiće se u fazama. Prvo dio zgrade na prostoru nekadašnjeg javnog wc-a koji će biti uređen. Dio koji pripada taksistima će biti prebačen na drugu stranu prema ulici Jevrejska. Predviđeno je da bude ukupno 48 parking mjesta. Biće montirana ulazno-izlazna naplatna rampa a zamišljeno je da to bude zatvoreni parking koji će vjerovatno raditi 24 sata.





# tioil

*PETROL Station*

**TIOIL d.o.o. Bila 48 - 72256, BiH**

Tel.: +387 30 707 890; Tel/FaX: +387 30 707893


e-mail: [tioil@tel.net.ba](mailto:tioil@tel.net.ba)

[www.tioil.com](http://www.tioil.com)



T-max dizel je dizel gorivo sa dodatkom aditiva za gorivo koje čisti kompletan sustav ubrizgavanja, sustav dovoda goriva, CR i PD sustav, te sustav ubrizgavanja goriva.

Predstavlja glavnu ulogu u zaštiti od korozije, rezultira boljom efikasnošću, te smanjuje potrošnju CO2 vrijednosti. Pridonosi mirnijem i lakšem radu motora. Očekujemo da našim potrošačima prilikom ili prije točenja, u kratkim crtama predstavite naš proizvod



**tioil**  
*PETROL Station*

Banja Luka

Drvar

Grahovo

Glamoč

Kupres

TD Livno

Begovača

Smričani

Kupres 1

Kupres 2

Livno 1

Livno 2

TD Livno

Smričani

Jajce 1

Jajce 2

Stara Bila 1

Stara Bila 2

TD Dolac

Stojkovići

N. Travnik

Bila

Nadioci

Busovača

Kreševo

Rama

Posušje

Gorica Grude

Široki Brijeg

Ljubuški 1

Ljubuški 2

Buna

Žitomislić

Čapljina 1

Čapljina 2

Stolac

Maslina

Neum

Han Ploča Kiseljak

Kiseljak

TD Sarajevo